



Broj: 01-50-1-15-51/09
Sarajevo, 15. april 2009. godine

ZAPISNIK
51. sjednice Predstavničkog doma
Parlamentarne skupštine Bosne i Hercegovine,
održane 15. aprila 2009. godine

Sjednica je počela u 10,10 sati. Prisustvovalo je 40 poslanika. Odsustvo su opravdali: Jovan Todorović i Zlatko Lagumdžija.

Iz Vijeća ministara BiH sjednici su prisustvovali: predsjedavajući Vijeća ministara BiH Nikola Špirić, te ministri: Dragan Vrankić, Tarik Sadović, Sven Alkalaj, Sredoje Nović, Safet Halilović, Selmo Cikotić, Mladen Zirojević, Bariša Čolak i Božo Ljubić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, Ambasade Velike Britanije te nevladine organizacije Centri civilnih inicijativa.

Na početku sjednice predsjedavajući Beriz Belkić podsjetio je da je potrebno da se Dom, u okviru prethodnih pitanja, izjasni o Prijedlogu rezolucije o zaštiti porodice, predlagača poslanika Adema Huskića, u smislu člana 148. stav (2) Poslovnika. Ukoliko Dom odluči, Prijedlog rezolucije bit će upućen nadležnoj komisiji radi davanja mišljenja, u suprotnom, ona će biti uvrštena u dnevni red današnje sjednice. Dom je jednoglasno, sa 36 glasova „za“ (iz Federacije BiH 25, iz Republike Srpske 11), odlučio da se Prijedlog rezolucije o zaštiti porodice prethodno razmatra u nadležnoj komisiji.

Zatim je predsjedavajući informirao Dom o inicijativi Huseina Nanića da se u dnevni red uvrsti Informacija o spremnosti institucija BiH za provođenje Sporazuma o stabilizaciji i pridruživanju, koji je na prošloj sjednici intervenirao zbog toga što se njegova inicijativa ne spominje u nerealiziranim zadacima. Predsjedavajući je podsjetio da je inicijativa praktično realizirana jer je razmatrana na 30. sjednici, održanoj 18. juna 2008., ali nije realiziran sljedeći zaključak Doma: „Zadužuje se Vijeće ministara BiH da izradi u što je moguće kraćem roku, a najkasnije za 45 dana, i Parlamentarnoj skupštini BiH dostavi informaciju o spremnosti institucija BiH za preuzimanje obaveza u vezi s primjenom Sporazuma o stabilizaciji i pridruživanju.“ Dodao je da je obavljen razgovor s predsjedavajućim Vijeća ministara BiH i da je postignut dogovor da ova informacija bude dostavljena u što kraćem roku.

Dalje je predsjedavajući rekao da je Kolegij imao namjeru da na dnevni red stavi i Izjašnjavanje o prijedlozima zaključaka predloženim u raspravi o Revidiranoj strategiji za provođenje Aneksa VII. Dejtonskog mirovnog sporazuma, ali da to nije učinjeno jer Zajednička komisija za ljudska prava, prava djeteta, mlade, imigraciju, izbjeglice, azil i etiku nije završila proceduru, odnosno nije dostavila usaglašen prijedlog zaključaka. Dodao je da će ova tačka biti uvrštena u dnevni red naredne sjednice.

U vezi s dnevnim redom 51. sjednice, predsjedavajući je rekao da učinjeno odstupanje u odnosu na raniji dogovor, kada je bilo predviđeno samo rasprava o dvije tačke, a to su: Izvještaj o radu Vijeća ministara BiH za 2008. godinu i Plan aktivnosti za ispunjavanje obaveza iz preporuke Evropske komisije u vezi s Mapom puta za liberalizaciju viznog režima za građane Bosne i Hercegovine. Međutim, u međuvremenu su dostavljeni materijali koji su ispunili poslovničke pretpostavke za razmatranje, a takvi su da ih je moguće realizirati na današnjoj sjednici, pa je dnevni red proširen. Istakao je da će se prioritet dati tačkama 2. i 3. dnevnog reda zbog njihovog značaja.

U raspravi o dnevnom redu učestvovali su: Jozo Križanović, Momčilo Novaković i Beriz Belkić.

Jozo Križanović stavio je primjedbu u vezi s Prijedlogom zakona o dopuni Zakona o plaćama i naknadama u institucijama BiH (tačka 5.), rekavši da se radi o relativno maloj izmjeni koja može imati velike

posljedice. Predložio je da se ova tačka skine s dnevnog reda i da se, u skladu sa ranijim zaključkom Doma, pitanje plaća i naknada ozbiljno razmotri, a takva inicijativa upućena je i Zajedničkoj komisiji za administrativne poslove. U vezi s tačkom 12. Davanje saglasnosti za ratifikaciju sporazuma, Jozo Križanović rekao je da mišljenja Komisije za vanjske poslove još nisu dostavljena, te da nema razloga za žurbu u njihovom razmatranju.

Predsjedavajući je kazao da je tačka 5. uvrštena kao obavezna tačka, u skladu s članom 127. Poslovnika i ona se ne može skinuti s dnevnog reda. U vezi s tačkom 12., kazao je da je Komisija obavila svoj dio posla i da će mišljenja biti dostavljena poslanicima, a razlog za razmatranje Sporazuma je sporost procesa ratifikacije i potreba što bržeg rješavanja određenih životnih problema.

Momčilo Novaković stavio je primjedbu na način dopunjavanja dnevnog reda neposredno pred sjednicu, jer većina poslanika nije ponijela potrebne materijale i dodao da, pored uvrštenih tačaka, njih bar još 15 ispunjava uslove za razmatranje. Istakao je da je potrebno ranije obavijestiti poslanike o mogućnosti uvrštavanja određenih tačaka u dnevni red, kako bi se mogli adekvatno pripremiti za sjednicu.

Predsjedavajući je u odgovoru na ranije diskusije rekao da prihvata određene kritike i naglasio da se u popratnom aktu kojim se materijali dostavljaju poslanicima uvijek naglasi da postoji mogućnost njihovog uvrštavanja u dnevni red sjednice. Kazao je da bi Dom trebalo da ima povjerenja u Kolegij u pogledu uvrštavanja i rasporeda tačaka na određene sjednice i dodao da je i za narednu, 53. sjednicu, već planirano više od 20 tačaka. Istakao je da se sjednice Proširenog kolegija mogu održavati i svake sedmice, ako je to potrebno.

U vezi s dnevnim redom, replicirali su: Remzija Kadrić, Sadik Bahtić, Niko Lozančić i Denis Bećirović.

Predsjedavajući je za 51. sjednicu Predstavničkog doma konstatirao sljedeći

D N E V N I R E D

1. Usvajanje Zapisnika 50. sjednice Predstavničkog doma;
2. Izvještaj o radu Vijeća ministara BiH za 2008. godinu;
3. Plan aktivnosti za ispunjavanje obaveza iz preporuke Evropske komisije u vezi s Mapom puta za liberalizaciju viznog režima za građane Bosne i Hercegovine;
4. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona o krivičnom postupku po hitnom postupku, u skladu s članom 127. Poslovnika;
5. Zahtjev poslanika Sadika Bahtića, Lazara Prodanovića i Velimira Jukića za razmatranje Prijedloga zakona o dopuni Zakona o plaćama i naknadama u institucijama BiH po hitnom postupku, u skladu s članom 127. Poslovnika;
6. Zahtjev Vijeća ministara BiH za razmatranje Prijedloga zakona o akcizama BiH po skraćenom postupku, u skladu s članom 126. Poslovnika;
7. Zahtjev Kluba poslanika SNSD-a za razmatranje Prijedloga zakona o dopuni Zakona o porezu na dodatu vrijednost po skraćenom postupku, u skladu s članom 126. Poslovnika;
8. Potvrđivanje Odluke predsjedavajućeg Vijeća ministara BiH o razrješenju zamjenika ministra komunikacija i prometa BiH i zamjenika ministra odbrane BiH za politiku i planiranje;
9. Razrješenje Ive Bradvice, ombudsmena za ljudska prava BiH, zbog podnošenja ostavke;
10. Imenovanje tri poslanika iz Predstavničkog doma u Ad hoc zajedničku komisiju za provođenje procedure imenovanja ombudsmena za ljudska prava umjesto Ive Bradvice;
11. Imenovanje tri poslanika iz Predstavničkog doma u Ad hoc zajedničku komisiju za provođenje procedure imenovanja:
 - a) Nezavisnog odbora i
 - b) Odbora za žalbe građana;
12. Davanje saglasnosti za ratifikaciju:
 - a) Sporazuma o sredstvima zajma između BiH, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta - Finansiranje sistema vodosnabdijevanja u općini Ljubuški,

- b) Sporazuma o sredstvima zajma između BiH, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta-Finansiranje sistema otpadnih voda u općini Fojnica,
- c) Sporazuma o zajmu između Vijeća ministara BiH, Vlade Federacije BiH i Vlade Republike Srpske i Izvozno-uvozne banke Koreje (Vladina agencija za EDCF) - Projekat modernizacije bolnica u BiH - Faza II,
- d) Sporazuma o sredstvima zajma između BiH, koju zastupa Ministarstvo finansija i trezora BiH i Kraljevine Španije, koju zastupa Ured kreditnog instituta – Finansiranje sistema otpadnih voda u općini Široki Brijeg,
- e) Protokola protiv nezakonite proizvodnje i trgovine vatrenim oružjem, njegovim dijelovima, komponentama i municijom, kojim se dopunjava Konvencija Ujedinjenih naroda protiv transnacionalnog organiziranog kriminala.

Ad. 1. Usvajanje Zapisnika 50. sjednice Predstavničkog doma

Predsjedavajući je konstatirao da je Zapisnik dostavljen poslanicima.

Denis Bećirović stavio je primjedbu na Zapisnik. Zatražio je da se dopuni dio Zapisnika na strani 6. u okviru Poslaničkih pitanja i odgovora, u dijelu njegovog komentara na dobiveni odgovor. Rekao je da je potrebno da se konstatira da je izrazio zadovoljstvo što je Vijeće ministara BiH napokon počelo raditi na izradi Strategije za borbu protiv korupcije, te da se doda da je izrazio nezadovoljstvo što već šest mjeseci insistira na tome da je Vijeće ministara BiH bilo dužno, u roku od tri mjeseca od usvajanja inicijative, dostaviti Predstavničkom domu Strategiju na razmatranje, a da Vijeće ministara BiH već godinu dana kasni s realizacijom zaključka Predstavničkog doma Parlamentarne skupštine BiH.

Zapisnik 50. sjednice usvojen je, uz ovu primjedbu, jednoglasno - sa 38 glasova „za“ (iz Federacije BiH 26, iz Republike Srpske 12).

Ad. 2. Izvještaj o radu Vijeća ministara BiH za 2008. godinu

Predsjedavajući Belkić je u uvodnim napomenama podsjetio da je ovaj izvještaj dostavljen u februaru 2009. godine, da su se komisije očitovale o njemu te da je bilo određenih intervencija prema Vijeću ministara BiH u smislu objedinjavanja nekih aktivnosti kako bi se dobila forma izvještaja. Procedura je završena i svi materijali dostavljeni su poslanicima.

Predsjedavajući Vijeća ministara BiH Nikola Špirić podnio je uvodno izlaganje o Izvještaju.

O ovoj tački vođena je duža rasprava u kojoj su učestvovali: Halid Genjac, Momčilo Novaković, Željko Kuzmanović, Savo Erić, Rifat Dolić, Husein Nanić, Mirko Okolić, Martin Raguž, Milica Marković, Branko Dokić, Šefik Džaferović, Milorad Živković, Bajazit Jašarević, Azra Hadžiahmetović, Slavko Jovičić, Sefer Halilović, Niko Lozančić, Denis Bećirović, Jozo Križanović, Drago Kalabić, Bakir Izetbegović, Sadik Bahtić, Sead Jamakosmanović, Mirjana Malić, Salko Sokolović, Hadži Jovan Mitrović, Vinko Zorić i Velimir Jukić.

Nakon rasprave, Domu se ponovo obratio predsjedavajući Vijeća ministara BiH Nikola Špirić.

Dom je, sa 27 glasova „za“ (iz Federacije BiH 18, iz Republike Srpske devet), deset „protiv“ i dva „suzdržana“ glasa, usvojio Izvještaj o radu Vijeća ministara BiH za 2008. godinu.

Denis Bećirović je u raspravi predložio pet zaključaka, a Klub poslanika SDA jedan zaključak.

Prilikom glasanja, Drago Kalabić iznio je prijedlog da se zaključci predloženi u raspravi o tački 2. upute Ustavnoj komisiji radi usaglašavanja, a zaključci predloženi u raspravi o tački 3. da se upute Zajedničkoj komisiji za evropske integracije.

Ovaj prijedlog nije prihvaćen – „za“ je glasalo 16 poslanika, „protiv“ 22, a „suzdržanih“ nije bilo.

Prvo se glasalo o zaključcima koje je predložio **Denis Bećirović**, i to pojedinačno, na njegov zahtjev.

„Za“ **zaključak broj 1.** glasalo je 16 poslanika (iz Federacije BiH 13, iz Republike Srpske tri), „protiv“ četiri, a 12 poslanika bilo je „suzdržano“. Predsjedavajući je konstatirao da nema potrebne entitetske većine i da će Kolegij naknadno obaviti usaglašavanje. Zaključak broj 1. glasi:

„Predstavnički dom Parlamentarne skupštine BiH zadužuje Vijeće ministara BiH da u roku od 30 dana dostavi Izvještaj ovom domu o uzrocima koji, iz godine u godinu, dovode do izrazito niskog stepena realizacije planiranih aktivnosti Vijeća ministara BiH, a posebno zakona.“

Zaključak broj 2. nije usvojen – „za“ je glasalo 12, „protiv“ 12, „suzdržanih“ nije bilo. Zaključak glasi:

„Predstavnički dom Parlamentarne skupštine BiH zadužuje Kolegij Predstavničkog doma da, u saradnji s Kolegijem Doma naroda i predsjedavajućim Vijeća ministara BiH, u roku od 30 dana dostavi Izvještaj ovom domu o uzrocima nefunkcionalne saradnje između Vijeća ministara BiH i Parlamentarne skupštine BiH u domenu usvajanja zakona. Naime, Parlamentarna skupština BiH je u 2008. godini od 61 zakona koji je uputilo Vijeće ministara BiH usvojila svega 19 (od čega samo 11 zakona iz programa Vijeća ministara BiH).“

Zaključak broj 3. usvojen je sa 17 glasova „za“ (iz Federacije BiH 12, iz Republike Srpske pet), 10 „protiv“ i 12 „suzdržanih“ glasova. Zaključak glasi:

„Predstavnički dom Parlamentarne skupštine BiH izražava nezadovoljstvo činjenicom da Vijeće ministara BiH nije realiziralo 146 zaključaka ovog doma, te zbog toga traži od Vijeća ministara BiH da u najkraćem roku pristupi njihovoj realizaciji.“

Zaključak broj 4. nije usvojen – „za“ je glasalo 11, „protiv“ 15, a „suzdržano“ je bilo 14 poslanika. Zaključak glasi:

„Predstavnički dom Parlamentarne skupštine BiH, zbog nedopustivo loše realizacije planiranih aktivnosti i neispunjavanja obaveza i zadataka predviđenih programom Vijeća ministara BiH, zaključuje da će najkasnije do 30. januara 2010. godine pokrenuti proceduru za smjenu Vijeća ministara BiH u slučaju da Vijeće ministara BiH i u 2009. godini ne realizira vlastiti program rada.“

O zaključku broj 5. Kolegij Doma obaviti će usaglašavanje zbog nedovoljne entitetske većine – „za“ je bilo 15 poslanika (iz Federacije BiH devet, iz Republike Srpske šest), „protiv“ devet i „suzdržanih“ je bilo 16 poslanika. Zaključak glasi:

„Predstavnički dom Parlamentarne skupštine BiH osnovat će posebnu istražnu komisiju (u kojoj će biti zastupljen po jedan predstavnik svake političke stranke u ovom domu) s ciljem da u roku od 45 dana ispita i dostavi Predstavničkom domu izvještaj koji sadrži podatke o:

- svim automobilima koje je Generalni sekretarijat Vijeća ministara BiH kupio od 15. aprila 2008. do 15. aprila 2009. godine;
- tačnim cijenama kupljenih automobila;
- načinu kupovine automobila;
- opravdanosti kupovine automobila.“

Nakon izjašnjavanja o zaključcima Denisa Bećirovića, pristupilo se izjašnjavanju o zaključku koji je predložio **Klub poslanika SDA**. „Za“ su glasala 23 poslanika (iz Federacije BiH 21, iz Republike Srpske dva), glasova „protiv“ nije bilo, a 16 poslanika bilo je „suzdržano“. Predsjedavajući je konstatirao da nema potrebne entitetske većine, pa je usaglašavanje odmah obavljeno. Kolegij nije postigao saglasnost. U drugom krugu glasanja zaključak nije usvojen – „za“ su bila 22 poslanika, „protiv“ 11 (iz Republike Srpske), „suzdržanih“ je bilo pet poslanika. Zaključak glasi:

„Predstavnički dom Parlamentarne skupštine BiH traži od Vijeća ministara BiH da hitno izvrši imenovanja rukovodilaca državnih institucija za koje je provedena zakonska procedura, te da intenzivira aktivnosti koje će rezultirati ubrzavanjem procesa ulaska BiH u evropske integracije i NATO i omogućiti da bh. ekonomija amortizira negativne uticaje svjetske ekonomske krize:

1. Evropski put

- izraditi precizan akcioni plan za ispunjavanje obaveza iz Sporazuma o stabilizaciji i pridruživanju,
- izraditi program integriranja BiH u Evropsku uniju,
- ispuniti preostale obaveze iz Mape puta za liberalizaciju viznog režima.

2. NATO

- ispuniti preostale prioritete programa IPAP,
- organizirati redovno razmatranje napretka BiH prema integracijama u NATO na tematskim sjednicama Vijeća ministara BiH dva puta godišnje,
- osigurati potrebne pretpostavke za podnošenje aplikacije BiH za program MAP.

3. Svjetska ekonomska kriza

- ubrzati provođenje Paketa 16 mjera za amortiziranje svjetske ekonomske krize,
- intenzivirati aktivnosti na dobivanju i realizaciji povoljnog međunarodnog kredita za podršku održivom povratku,
- intenzivirati aktivnosti na ugovaranju i počinjanju radova na izgradnji Autoputa na Koridoru 5c iz sredstava odobrenih međunarodnih kredita.

Vijeće ministara BiH će u julu i decembru 2009. godine izvijestiti Predstavnički dom o stepenu izvršenja mjera predloženih u ovom zaključku.“

Ad. 3. Plan aktivnosti za ispunjavanje obaveza iz preporuke Evropske komisije u vezi s Mapom puta za liberalizaciju viznog režima za građane Bosne i Hercegovine

Predsjedavajući je dao uvodne napomene. Podsjetio je na zaključak Zajedničke komisije za evropske integracije kojim se od Vijeća ministara BiH traži da na sjednici Doma obrazloži razloge kašnjenja provođenja pojedinih mjera i da predloži prihvatljive načine rješavanja spornih mjera iz Mape puta.

Domu se, u okviru uvodnog izlaganja, obratio predsjedavajući Vijeća ministara BiH Nikola Špirić, a zatim i predsjedavajući Interresorne radne grupe za liberalizaciju viznog režima Samir Rizvo.

U raspravi su učestvovali: Šefik Džaferović, Selim Bešlić, Rifat Dolić, Halid Genjac, Husein Nanić, Adem Huskić, Remzija Kadrić, Denis Bećirović, Niko Lozančić i Lazar Prodanović.

Sa 35 glasova „za“ (iz Federacije BiH 22, iz Republike Srpske 13), bez glasova „protiv“ i četiri „suzdržana“ glasa, Dom je primio k znanju Plan aktivnosti za ispunjavanje obaveza iz preporuke Evropske komisije u vezi s Mapom puta za liberalizaciju viznog režima za građane Bosne i Hercegovine.

U raspravi su zaključke su predložili: Adem Huskić (dva), Šefik Džaferović (jedan), Remzija Kadrić(dva) i Husein Nanić (tri).

Dom je usvojio zaključke Šefika Džaferovića i Adema Huskića.

„Za“ zaključak Šefika Džaferovića glasalo je 27 poslanika (iz Federacije BiH 23, iz Republike Srpske četiri), glasova „protiv“ nije bilo, a „suzdržalo“ se 12 poslanika. Kako nije bilo dovoljne entitetske većine, Kolegij je odmah obavio usaglašavanje. Saglasnost nije postignuta. U drugom krugu usvojen je zaključak („za“ 26, „protiv“ osam /iz Republike Srpske/, „suzdržana“ četiri).

Zaključci Adema Huskića usvojeni su sa 26 glasova „za“ (iz Federacije BiH 20, iz Republike Srpske šest), jednim „protiv“ i 12 „suzdržanih“ glasova. Usvojeni zaključci glase:

- 1. Zadužuje se Vijeće ministara BiH da svaki mjesec podnosi Predstavničkom domu Izvještaj o realizaciji obaveza BiH iz Mape puta za liberalizaciju viznog režima.**
- 2. Svakog mjeseca nadležne komisije će, po dobivenom izvještaju, analizirati realizaciju akcionog plana i Predstavničkom domu dostaviti prijedlog potrebnih mjera.**
- 3. Aktivnosti koje nisu realizirane potrebno je razvrstati po nosiocima tako da svaki nosilac aktivnosti napravi vlastiti akcioni plan s preciznim rokovima za njegovo izvršenje.**

(Zaključak broj 1. usvojen je na prijedlog Šefika Džaferovića, a zaključci broj 2. i 3. na prijedlog Adema Huskića.)

„Za“ zaključke Huseina Nanića glasala su 23 poslanika (iz Federacije BiH 20, iz Republike Srpske tri), „protiv“ 11, „suzdržanih“ šest. Obavljeno je usaglašavanje zbog nedostatka entitetske većine. Kolegij nije postigao saglasnost. U drugom krugu zaključci nisu usvojeni – „za“ su bila 22 poslanika, „protiv“ 17 (iz Federacije BiH šest, iz Republike Srpske 11), „suzdržan“ jedan poslanik. Zaključci glase:

„1. Predstavnički dom Parlamentarne skupštine BiH traži od Vijeća ministara BiH da u što kraćem roku, ne dužem od 30 dana, u parlamentarnu proceduru uputi sve zakone navedene kao uslov za ispunjavanje obaveza BiH iz Mape puta za liberalizaciju viznog režima za građane BiH.

2. Zadužuje se rukovodstvo Predstavničkog doma Parlamentarne skupštine BiH da sazove tematsku sjednicu ovog doma na kojoj bi se raspravljalo o navedenim zakonima.

3. Pozivaju se svi nosioci diplomatskih pasoša da kao čin moralne i političke odgovornosti prema građanima BiH vrate diplomatske pasoše i podijele sudbinu sa svim građanima u pogledu traženja viza ukoliko u roku od 90 dana ne izvrše obaveze za koje su odgovorni.“

„Za“ zaključke Remzije Kadrića glasao je 21 poslanik (iz Federacije BiH 19, iz Republike Srpske dva), „protiv“ osam, „suzdržanih“ deset. Predsjedavajući je konstatirao da nema entitetske većine. Kolegij nije postigao saglasnost. U drugom krugu zaključci nisu usvojeni – „za“ su bila 22 poslanika, „protiv“ deset (iz Republike Srpske), „suzdržanih“ šest. Zaključci glase:

„1. Povodom rasprave iz Mape puta za liberalizaciju viznog režima i pitanja primjene Sporazuma o viznim olakšicama država članica Evropske unije, Predstavnički dom Parlamentarne skupštine BiH, cijeneći sve okolnosti, smatra da sve države koje su potpisale i ratificirale Evropsku konvenciju za zaštitu ljudskih prava i osnovnih sloboda, zajedno s njenim protokolima, u potpunosti treba da je poštuju i provode, zato što je u Konvenciji, između ostalog, predviđeno i pravo ljudi na „slobodu kretanja i prebivališta“.

2. Pravo ljudi na slobodu kretanja ne bi se moglo ograničavati u većoj mjeri od one koja je predviđena Konvencijom.“

Ad. 4. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona o krivičnom postupku po hitnom postupku, u skladu s članom 127. Poslovnika

Predsjedavajući je u uvodnim napomenama podsjetio da se radi o Zakonu koji je na privremenoj osnovi proglasio visoki predstavnik za BiH svojom odlukom od 20. februara 2009. godine te da je on na snazi sve dok ga Parlamentarna skupština BiH ne usvoji u istovjetnom tekstu.

Nije bilo rasprave.

„Za“ zahtjev za hitni postupak glasalo je 28 poslanika (iz Federacije BiH 26, iz Republike Srpske dva), 10 „protiv“, „suzdržana“ dva. Predsjedavajući je konstatirao da nema potrebne entitetske većine, pa je odmah provedeno usaglašavanje. Kolegij nije postigao saglasnost. U drugom krugu glasanja nije usvojen zahtjev za hitni postupak – „za“ je glasalo 28 poslanika, „protiv“ 11 (iz Federacije BiH), „suzdržan“ jedan poslanik. Predsjedavajući je konstatirao da Zakon o izmjenama i dopunama Zakona o krivičnom postupku koji je proglasio visoki predstavnik za BiH ostaje na snazi.

Ad. 5. Zahtjev poslanika Sadika Bahtića, Lazara Prodanovića i Velimira Jukića za razmatranje Prijedloga zakona o dopuni Zakona o plaćama i naknadama u institucijama BiH po hitnom postupku, u skladu s članom 127. Poslovnika

Predsjedavajući je dao uvodne napomene.

Nije bilo rasprave o zahtjevu za hitni postupak.

Zahtjev za hitni postupak usvojen je sa 27 glasova „za“ (iz Federacije BiH 20, iz Republike Srpske sedam), pet „protiv“ i šest „suzdržanih“ glasova.

U raspravi o Prijedlogu zakona učestvovali su: Sadik Ahmetović, Šefik Džaferović, Bajazit Jašarević, Jozo Križanović, Drago Kalabić, Momčilo Novaković i Salko Sokolović.

Sa 34 glasa „za“ (uz Federacije BiH 25, iz Republike Srpske devet), bez glasova „protiv“ i pet „suzdržanih“ glasova, usvojen je Prijedlog zakona o dopuni Zakona o plaćama i naknadama u institucijama BiH.

Na prijedlog Bajazita Jašarevića iznesen u raspravi, Dom je, sa 27 glasova „za“ (iz Federacije BiH 20, iz Republike Srpske sedam), tri „protiv“ i sedam „suzdržanih“ glasova, usvojio sljedeći zaključak:

„Zadužuje se Zajednička komisija za administrativne poslove da osnovicu za obračun plaća poslanika uskladi s donesenim Zakonom o dopuni Zakona o plaćama i naknadama u institucijama BiH.“

Ad. 6. Zahtjev Vijeća ministara BiH za razmatranje Prijedloga zakona o akcizama BiH po skraćenom postupku, u skladu s članom 126. Poslovnika

Nakon uvodnih napomena predsjedavajućeg, u raspravi o skraćenom postupku učestvovali su: Momčilo Novaković, Bajazit Jašarević, Jozo Križanović, Slavko Jovičić, Mirko Okolić i Šefik Džaferović, a Domu se obratio i predsjedavajući Vijeća ministara BiH Nikola Špirić.

Zahtjev za skraćeni postupak usvojen je s 31 glasom „za“ (iz Federacije BiH 22, iz Republike Srpske devet), pet glasova „protiv“ i četiri „suzdržana“ glasa.

Ad. 7. Zahtjev Kluba poslanika SNSD-a za razmatranje Prijedloga zakona o dopuni Zakona o porezu na dodatu vrijednost po skraćenom postupku, u skladu s članom 126. Poslovnika

Predsjedavajući je dao uvodne napomene, nakon kojih nije bilo rasprave.

Sa 23 glasa „za“ (iz Federacije BiH 14, iz Republike Srpske devet), 13 glasova „protiv“ i četiri „suzdržana“ glasa, usvojen je zahtjev za skraćeni postupak.

Ad. 8. Potvrđivanje Odluke predsjedavajućeg Vijeća ministara BiH o razrješenju zamjenika ministra komunikacija i prometa BiH i zamjenika ministra odbrane BiH za politiku i planiranje

Predsjedavajući je dao uvodne napomene, a u raspravi su učestvovali: Momčilo Novaković, Mirko Okolić, Branko Dokić, predsjedavajući Vijeća ministara BiH Nikola Špirić i Niko Lozančić.

Sa 30 glasova „za“ (iz Federacije BiH 20, iz Republike Srpske 10), dva glasa „protiv“ i sedam „suzdržanih“ glasova, Dom je potvrdio Odluku predsjedavajućeg Vijeća ministara BiH o razrješenju zamjenika ministra komunikacija i prometa BiH Veselina Poljaševića i zamjenika ministra odbrane BiH za politiku i planiranje Igora Crnatka.

Branko Dokić je u raspravi predložio sljedeći zaključak:

„Zamjenici ministra komunikacija i prometa BiH Veselin Poljašević i ministra odbrane BiH Igor Crnadak nastavljaju obavljati svoju dužnost dok Predstavnički dom Parlamentarne skupštine BiH ne potvrdi njihove nasljednike.“

Navedeni zaključak usvojen je sa 27 glasova „za“ (iz Federacije BiH 19, iz Republike Srpske osam), četiri „protiv“ i osam „suzdržanih“ glasova.

Ad. 9. Razrješenje Ive Bradvice, ombudsmena za ljudska prava Bosne i Hercegovine zbog podnošenja ostavke

Predsjedavajući je dao kratke uvodne napomene.

Nije bilo rasprave.

Dom je, sa 32 glasa „za“ (iz Federacije BiH 22, iz Republike Srpske 10), jednim „protiv“ i sedam „suzdržanih“ glasova, razriješio Ivu Bradvicu, ombudsmena za ljudska prava Bosne i Hercegovine zbog podnošenja ostavke.

Ad. 10. Imenovanje tri poslanika iz Predstavničkog doma u Ad hoc zajedničku komisiju za provođenje procedure imenovanja ombudsmena za ljudska prava umjesto Ive Bradvice

Predsjedavajući je u uvodnim napomenama rekao da je na sjednici Kolegija u proširenom sastavu usaglašeno da za članove Ad hoc komisije budu predloženi poslanici: **Drago Kalabić, Ekrem Ajanović i Velimir Jukić.**

Ovaj prijedlog usvojen je sa 29 glasova „za“ (iz Federacije BiH 19, iz Republike Srpske 10), šest „protiv“ i četiri „suzdržana“ glasa.

Ad. 11. Imenovanje tri poslanika iz Predstavničkog doma u Ad hoc zajedničku komisiju za provođenje procedure imenovanja:

- a) Nezavisnog odbora i
- b) Odbora za žalbe građana.

U uvodnim napomenama predsjedavajući je rekao da je prijedlog Kolegija Doma i Kolegija u proširenom sastavu da se u Ad hoc komisiju iz ove tačke dnevnog reda imenuju poslanici koji su i ranije bili njeni članovi: **Adem Huskić, Drago Kalabić i Vinko Zorić.**

U raspravi su učestvovali: Momčilo Novaković, Adem Huskić i Drago Kalabić.

Sa 30 glasova „za“ (iz Federacije BiH 21, iz Republike Srpske devet), četiri „protiv“ i šest „suzdržanih“ glasova, u Ad hoc komisiju iz ove tačke imenovani su pomenuti poslanici.

Ad. 12. Davanje saglasnosti za ratifikaciju:

- a) Sporazuma o sredstvima zajma između BiH, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta - Finansiranje sistema vodosnabdijevanja u općini Ljubuški,
- b) Sporazuma o sredstvima zajma između BiH, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta-Finansiranje sistema otpadnih voda u općini Fojnica,
- c) Sporazuma o zajmu između Vijeća ministara BiH, Vlade Federacije BiH i Vlade Republike Srpske i Izvozno-uvozne banke Koreje (Vladina agencija za EDCF) - Projekat modernizacije bolnica u BiH - Faza II,
- d) Sporazuma o sredstvima zajma između BiH, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – Finansiranje sistema otpadnih voda u općini Široki Brijeg,
- e) Protokola protiv nezakonite proizvodnje i trgovine vatrenim oružjem, njegovim dijelovima, komponentama i municijom, kojim se dopunjava Konvencija Ujedinjenih naroda protiv transnacionalnog organiziranog kriminala.

Predsjedavajući je dao uvodne napomene.

Ni u okviru ove tačke nije bilo rasprave.

Predsjedavajući je prvo dao na glasanje prijedlog da se obavi jedinstveno glasanje o svim sporazumima. Ovaj prijedlog usvojen je sa 38 glasova „za“ (iz Federacije BiH 25, iz Republike Srpske 13), jednim „protiv“ i jednim „suzdržanim“ glasom.

Saglasnost za ratifikaciju sporazuma iz ove tačke dnevnog reda data je sa 39 glasova „za“ (iz Federacije BiH 26, iz Republike Srpske 13), bez glasova „protiv“ i jednim „suzdržanim“ glasom.

Time je realiziran dnevni red.

Predsjedavajući je podsjetio da će 52. sjednica Doma biti održana 29.4.2009.

Sjednica je završena u 19 sati.

Sastavni dio Zapisnika je transkript 51. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVALAČI
PREDSTAVNIČKOG DOMA
Beriz Belkić